

LISTOVI GRAČANIČKOG KALENDARA OD 2. 5. DO 31. 10. 2011. GODINE

Dr. sc. Omer Hamzić



2. 5. 2011.

UMRO MIRZA DEDIĆ, PJESNIK TUŽNOG LIKA

Malo je ko znao da je ovaj “pjesnik tužnog lika bio bolestan.” Zato je njegova smrt iznenadila mnoge njegove poznanike i prijatelje, a posebno one koji su voljeli i poštovali njegovu poeziju. Bio je osebujna ličnost, izvanredan pjesnički talent, nažalost, nikada do kraja izgrađen. Sa skromnim obrazovanjem, radeći kao kondukter, a pjesnički doživljavajući okruženje sa kojim je nerijetko bio u sukobu, kao i sam sa sobom, izvanredan talent, koji je pjesnički živio i mililo, ostao je ipak na razini pjesničke naive, sanjar i talent koji je stremio ka visinama, dok ga je pritiskala svakodnevna trivijalnost života i borba za goli opstanak. Zanosio se mišlju, odmah nakon rata, dok je još curila krvi Srebrenice, po našim životima i srcima – da opjesmi Srebrenicu, kao planetarnu tragediju i zločin nad zločinima... Jedan je od mnogih koji su shvatili da nemaju snage za to... Autor je tri pjesničke zbirke, od kojih je *raskopčana djevojka*, kao prva izazvala značajnu pažnju kao originalna i zanimljiva, buntovna i ljudski topla, opora na momente i pitka...

Ukopan je 3. 5. 2011. u mjesnom greblju u Miričini

14. i 15. 5. 2011.

ČETRNAESTI FESTIVAL DJEČJEG TEATRA BIH U GRAČANICI

Organizatori festivala i ove godine bili su Centar za dramski odgoj iz Mostara i Bosanski kulturni centar iz Gračanice. Prvog dana odigrane su predstave: “**Grad Loncipunum**” (OŠ “Kulin ban” Tešanjka, autor: Nasiha

Kapidžić-Hadžić, reditelj: Nerma Prnjavorac-Dobrijević, trajanje predstave 35 min–4 čina), **”Veliki zavodnik”** (OŠ “Čengić Vila I Sarajevo, autor: Zlatko Kričić, reditelj Maida Bešić, trajanje: 25 minuta), **”Pepeljuga–život nakon vjenčanja”** (Amatersko pozorište “Neretva” Konjic, autor: Emina Šehić, reditelj: Nedžad Gračani i Emina Šehić, trajanje 45 minuta) i **”Ko je ukrao dnevnik”** (OŠ “Hasan Turcalo Brzi” Goražde, autor: Milenko Matić, reditelji: Adisa Herak i Aldin Mešić, trajanje 20 minuta). Drugog dana Festivala odigrane su sljedeće četiri predstave: **”Ljubavno pismo”** (Teatar “Bambino”, Centar za mlade Sarajevo, autor: Kosta Trifković, reditelj: Edin Drljević, trajanje: 60 minuta), **”Vrisak tišine”** (Dječje pozorište “Eko art” Bugojno, autor: Dječje pozorište “Eko art”, reditelj: Sanja Krnjajić, trajanje: 30 minuta), **”Brbljavija”** (OŠ “Hasan Kikić” i KUD “Adem Alić” Gračanica, autor: Kristina Jakšić, reditelji: Albina Junuzović i Miralem Džaferović, trajanje: 20 minuta) i **”Pile Jole”** (Dječji studio glume “Roda” Banja Luka, autor: Zlatko K., reditelj: Nevenka Rodić, trajanje 30 minuta).

Festival je pratio tročlani žiri, koji je imenovao Upravni odbor Centra za dramski odgoj u sljedećem sastavu: Ljubica Ostojić, Nedžad Peljto i Zoran Vasiljević. Poslije izvođenja predstava, organizovani su okrugli stolovi i rasprave u kojima su članovi žirija, publika i drugi učesnici Festivala iznosili svoja zapažanja, kritike i pohvale. Za *najbolju predstavu u cjelini* Žiri je proglasio predstavu “Brbljavija” (ansambl iz Gračanice), za *ansambl igru* predstavu “Pile Jole” (ansambl iz Banja Luke), za *umjetničko-pedagoško vodstvo*, predstavu “Veliki zavodnik” (ansambl iz Sarajeva) i za *originalan dramski tekst, predložak i ideju*, predstavu “Vrisak tišine”

U cjelini gledano, sve su predstave bile, prije svega, odraz istinskog dječjeg stvaralaštva. U njima je do punog izražaja došla razigranost djece i tretiranje pitanja, problema i interesa djeteta.

24. 05. 2011.

DOGOVOR O SISTEMATSKOM PRIKUPLJANJU RATNE DOKUMENTACIJE (1992. – 1995.)

Na sastanku sa predstavnicima boračkih organizacija i ratnim komandantima općine Gračanica, koji je organizovao Općinski načelnik povodom Dana odbrane, obavljen je konkretan dogovor o sistematskom prikupljanju dokumentacije koja se odnosi na period rata za Bosnu i Hercegovinu (1992. – 1995.) na području općine Gračanica.

Bila je to inicijativa Koordinacije boračkih organizacija, koju je Općinski načelnik pozdravio i prihvatio, sa obećanjem da će obezbijediti materijalne, kadrovske i institucionalne pretpostavke za taj, kako je rečeno, iznimno važan i dugoročan posao.

26. 05. 2011.

UHAPŠEN RATKO MLADIĆ, RATNI KOMANDANT VOJSKE REPUBLIKE SRPSKE

To je, prije svega bila odluka aktuelne vlasti Srbije, koja je sa tim hapšenjem napravila izuzetno dobar pazar, bez obzira što je protiv tog hapšenja bilo preko 50% Srba u Srbiji. Za veliku većinu bosanskih Srba Ratko Mladić ostaje nacionalni heroj. Što se tiče žrtava... Samo gorčina i očaj. Djelo (ili projekat) tog zločinca (kao i kompletnog ratnog vojno-političkog vrha bosanskih Srba), izraslo na zločinu i genocidu, danas je u boljem stanju nego što su oni mogli ikada i sanjati. Ma kako se zvalo, ono će nadživjeti i njih i Hag – i žrtve na čijim je patnjama, mukama i krvi izniklo–što je planetarna nepravda do neba – neviđena nepravda odavde do Haga i dalje...

31. 05. 2011.

29. SJEDNICA OPĆINSKOG VIJEĆA: USVOJENA ODLUKA O DODJELI OVOGODIŠNJIH OPĆINSKIH PRIZNANJA, NEKOLIKO IZVJEŠTAJA I INFORMACIJA

Prije prelaska na dnevni red jednu vijećničku inicijativu (u ime grupe privrednika iz Radne zone III) izložio je Sead Gazibegović (SDP), čija je suština da se u narednom periodu u toj zoni planiraju zahvati koji bi

onemogućili nadiranje vode na postojeći loše izveden Karanovački most, te tako ublažili plavni val i štete u ovom dijelu Sprečkog Polja. Inicijativu je podržao i vijećnik Avdo Bajraktarević (SDP), koji je postavio pitanje da li se planira sanacija i asfaltiranje puta prema Karanovačkom mostu na toj istoj lokaciji. Općinski načelnik dao je odgovor da se ove godine planira sanacija i asfaltiranje te saobraćajnice do iza firme "Isovod".

Najviše vremena vijećnici su potrošili oko utvrđivanja odluke o dodjeli ovogodišnjih općinskih priznanja, konkretno oko amandmana vijećnika Hasana Puškara (SDA), koji je predložio da se ove godine Općinsko priznanje "Zlatna plaketa" dodijeli Mješovitoj srednjoj školi Gračanica, umjesto firmi "Mirna" d.o.o. Gračanica, kako je utvrđeno u konačnom prijedlogu Komisije. Amandman su podržali vijećnici SDA, te nekoliko pojedinaca iz drugih klubova, pa je uslijedila dugotrajna rasprava sa mnogo pauza "za usaglašavanje" i natezanja. Konačno, sa 19 "ruku" ZA i 11 PROTIV "prošao je prijedlog koji je i došao pred vijećnike, tako da će se 2. juna, za Dan općine "Zlatna plaketa" dodijeliti firmama "Edo slad" i "Mirna", "Zlatna značka" Nurikić Ibrahimu iz Škahovice, Salihbasić Šehzadi i Škrebo Sadiji iz Gračanice. Posebno općinsko priznanje "Počasni građanin općine Gračanica" dodijelit će se Nj. E. Ambasadoru Japana u Bosni i hercegovini Futao Motai, za zasluge u obezbjeđivanju sredstava za deminiranje na području općine Gračanica. I ova rasprava je pokazala da se u postupku dodjele i kriterijima za dodjelu tih priznanja moraju izvršiti korjenite promjene. U protivnom, sve to će još više devalvirati i čitav postupak učiniti besmislenim.

U nastavku sjednice, nakon kraće rasprave vijećnici su usvojili Nacrt odluke o davanju saglasnosti za donošenje Odluke o pristupanju dodjele koncesije za obavljanje komunalnih djelatnosti prijevoza putnika na području općine Gračanica, o kojoj će se obaviti javna rasprava u narednih 20 dana,

nakon čega slijedi postupak dodjele te koncesije kroz nadležne organe TK.

Izvještaji o radu i finansijskom poslovanju komunalnih javnih preduzeća "Vodovod i kanalizacija" i "Komus" za 2010. g., te Izvještaj o radu Općinskog pravobranilaštva za 2010. godinu, prihvaćeni su bez veće rasprave.

Nakon toga usvojene su sljedeće informacije: o radu i vršenju nadzora općinskih inspekcija u 2010. godini, o realizaciji Projekta selektivnog prikupljanja otpada, o sakupljanju, odvozu i deponovanju komunalnog otpada na području općine Gračanica, te Informacija o uspostavi GIS-a (geografski informacioni sistem) u Općini Gračanica.

Tokom javne rasprava o nacrtu Zakona o priznavanju inozemnih obrazovnih isprava na području naše općine, kako je konstatovalo, nisu date nikakve primjedbe.

Na kraju vijećnici su usvojili nekoliko rješenja i zaključaka Imovinsko-pravne službe.

2. 6. 2011.

DAN OPĆINE GRAČANICA: SVEČANA AKADEMIJA—KRATKO PODSJEĆANJE NA POSTIGNUTE REZULTATE AKTUELNE VLASTI I DODJELA OPĆINSKIH PRIZNANJA

U jutarnjim satima, u kabinetu općinskog načelnika, obavljani su odvojeni protokolarni razgovori sa ambasadorima Francuske Rollandom Gillesom i Japana Futao Motai, koji su se odazvali pozivu i svojim prisustvom uveličali ovogodišnje obilježavanje Dana općine Gračanica. Prije početka svečane akademije, ambasadori su odali počast i zajedno sa općinskom delegacijom položili cvijeće na Centralno spomen obilježje poginulim borcima/šehidima u parku ispred zgrade općine, a zatim prisustvovali svečanoj akademiji.

Prigodan referat pročitao je Općinski načelnik Nusret Helić, u kojem je podvukao historijsku vertikalu i simbolički značaj 2. juna za općinu Gračanica, a potom istakao najvažnije rezultate postignute na

općini Gračanica između dva juna. O tome je, između ostalog rekao: "I u prošloj godini smo nastavili znatna ulaganja u infrastrukturu i kapitalne projekte. Ukupno je uloženo preko 4 miliona KM budžetskih sredstava, od čega u komunalnu infrastrukturu 2.000.000, a u ostalu infrastrukturu i kapitalne projekte više od 2 miliona KM. To je više od jedne trećine općinskog budžeta, što znači da je i u vrijeme ove krize naš budžet bio razvojni, a ne potrošački. Rezultati tih ulaganja su vidljivi: novi kilometri asfaltiranih puteva u mjesnim zajednicama, obnovljene gradske ulice, regionalni put kroz grad, rekonstruisani vodovodi u mjesnim zajednicama, kanalizaciona mreža u naselju Bazen, kolektor kroz grad (Japaga), nastavljena regulacija korita Sokoluše, postavljeni novi stubovi javne rasvjete u gradu i mjesnim zajednicama, završeno deminiranje Sprečkog polja, uređena poljoprivredna zemljišta, otkupljena je Sportska sala Luke, podignut nivo čistoće i higijene grada i uopće ekologije itd.

Ovih dana, to se može vidjeti, Gračanica i okolina je pravo radilište. Realizuju se projekti infrastrukture iz ove godine.

Projekat toplifikacije Gračanice na čijoj smo pripremi intenzivno radili u posljednje četiri godine, definitivno je ušao u fazu svoje intenzivne realizacije. Obećanje da će se prvi potrošači ogrijati u sezoni grijanja 2008/2009. smo ispunili. Naselje "Luke" i desetak industrijskih pogona te ključni javni objekti u gradu, uključujući i zgradu općine, prošle zime imali su centralno grijanje sa prve eko toplane u BiH. Toplifikacija Gračanice je, poslije urbanizacije gradskog jezgra u periodu Austrougarske, elektrifikacije grada krajem tridesetih i dovođenja pitke vode početkom šezdesetih godina prošlog stoljeća, uistinu, najznačajniji komunalni projekat u modernoj historiji ovoga grada. Podsjetio bih: u ovaj projekat ulaže se 15 miliona KM, od čega jednu trećinu čine nepovratna sredstva iz evropskih i domaćih ekoloških fondova. Zadovoljstvo mi je reći da se toplo-

vod razvija po nekim našim mahalama kao što je Čiriš, a priključuju se i drugi javni i privatni objekti..."

Nakon pročitanoog referata, tradicionalna općinska priznanja dobile su gračančke firme "Edo slad" i "Mirna" ("Zlatna plaketa") i istaknuti pojedinci: Ibrahim Nurkić, Sadija Škrebo i Šehzada Salihbašić ("Zlatna značka". Priznanje "Počasni građanin Gračanice" dobio je Ambasador Japana Futao Motai u znak zahvalnosti za dodijeljenu pomoć Vlade Japana za deminiranje i još nekoliko krupnih komunalnih akcija na općini, među kojima ističemo vodovod u Gračanici. Pošto je, uz iskrene aplauze prisutnih, primio priznanje, Ambasador se biranim riječima zahvalio na dodijeljenom priznanju, koje je razumio kao priznanje narodu dalekog Japana, naglasivši zahvalnost za simboličnu pomoć Gračanice, poslije nedavne prirodne i nuklearne katastrofe u toj zemlji.

2. 6. 2011.

DAN OPĆINE GRAČANICA: U KRUGU VETERINARSKJE STANICE GRAČANICA OTVOREN AMBULANTNI STACIONAR ZA PSE

... koji će, kako je rekao direktor Veterinarske stanice Zajim Spahić, znatno doprinijeti civilizacijskom rješavanju vrlo aktuelnog problema pasa litalica u Gračanici.

2. 6. 2011.

DAN OPĆINE GRAČANICA: PUŠTEN U UPOTREBU NOVOIZGRAĐENI DIO OBJEKTA DOMA ZDRAVLJA

...koji je, kako je, pozdravljajući goste istakla direktorica Zehra Karahasanović, najvećim dijelom građen vlastitim snagama i sredstvima tog kolektiva. Otvaranjem ovog



objekta i njegovim adekvatnim opremanjem primarna zdravstvena zaštita stanovništva ove općine bit će znatno poboljšana.

3. 6. 2011.

OTKRIVENO SPOMEN OBILJEŽJE POGINULIM BORCIMA/ŠEHIDIMA U TRNOVCIMA

Na spomeniku, koji je lociran na raskršnici puteva za Džakule i Prijeko Brdo ispisana su sljedeća imena: Jukić (Hamdije) Jasmin, Selimović (Ahmeta) Hasan, Musić (Jasima) Izet, Bajrić (Ibrahima) Vehid i Hotić (Avde) Mehmed—svi sa područja Trnovaca, svi pripadnici Armije BiH. Najmlađi je imao 21, a najstariji 27 godina. Spomenik je na skromnoj svečanosti (zajedno sa Općinskim načelnikom), otkrila majka poginulog sina Jasmina, Fehima Jukić, koja je sa svojim suprugom Hamdijom darovala i zemljište za izgradnju tog spomenika — za podsjećanje i vječno pamćenje.



6. 7. 2011.

30. SJEDNICA OPĆINSKOG VIJEĆA GRAČANICA: SUGLASNOST ZA POKRETANJE PROCEDURE DODJELE KONCESIJE ZA OBAVLJANJE PRIJEVOZA

PUTNIKA KAO KOMUNALNE DJELATNOSTI NA PODRUČJU OPĆINE

Procedura je pokrenuta nakon što se Komisiji za koncesije TK obratilo Ministarstvo trgovine, turizma i saobraćaja radi odobravanja Studije ekonomske opravdanosti obavljanja komunalne djelatnosti prijevoza putnika na području općine Gračanica, s dokumentacijom za dodjelu samoinicijativnom ponuđaču “Avis” d.o.o. Gračanica. Za nastavak procedure dodjele koncesije navedenoj firmi, neophodno je do Općinskog vijeće prethodno donese Odluku, odnosno dadne svoju suglasnost za vođenje tog poprilično složenog postupka. Iako je o ovoj odluci (o davanju saglasnosti) provedena propisan javna rasprava na terenu, u mnogim pitanjima koja se otvaraju dodjelom koncesije za javni prijevoz, vijećnici nisu postigli suglasnost, tako da je nakon iscrpljujuće diskusije ta tačka “apsolvirana” tijesnom većinom od svega 16 glasova vijećnika SDP i njegovih koalicionih partnera. Tako je i formalno otvoren postupak dodjele koncesije prevoza putnika u javnom saobraćaju na području općine Gračanica lokalnoj firmi d.o.o. “Avis”, koja je privatizirana prije nekoliko godina. Prema zakonskim propisima, ovaj postupak vodit će Komisija za koncesije TK, u čiji sastav su u ime Općine Gračanica imenovana dva člana.

Na ovoj sjednici vijećnici su usvojili i Odluku o broju i visini stipendija za učenike i studente u školskoj 2011/2012. godine, po kojoj će se dodijeliti ukupno 80 stipendija i to po 1.200 KM za studente i po 600 KM za učenike. Usvojene su i tri informacije: o stanju lokalnih i nerazvrstanih cesta, o aktuelnim privrednim kretanjima i o zbrinjavanju napuštenih i izgubljenih životinja na području općine Gračanica.

21. 7. 2011.

UMRO FIKRET KONJIĆ UČO

Nakon kraće bolesti prestalo je da kuca srce tog dobrog i plemenitog čovjeka, novinara publiciste, bibliotekara, sportskog radnika... saradnika ovog časopisa. Rođen je 1.

januara 1954. godine u Velikoj Brijesnici. Naredne godine roditelji mu doseljavaju u Gračanicu, koju je uvijek smatrao svojim rodnim gradom. Nakon završene osnovne škole u Gračanici, upisuje se u Učiteljsku školu u Tuzli, koju je završio 1972. godine. Do 1979. godine radio je s manjim ili većim prekidima u prosvjeti, kada je primljen u stalni radni odnos u tadašnji Narodni univerzitet u Gračanici.

Najveći dio radnog vijeka proveo je kao bibliotekar u Narodnoj biblioteci "Dr. Mustafa Kamarić" i u Radiju Gračanica kao novinar. Kao honorarni dopisnik prije rata radio je za više listova u zemlji: *Večernje novosti* (Beograd), *Večernje novine*, *AS* i *Oslobođenje* (Sarajevo), *Glas komun*a (Doboj), *Front slobode* (Tuzla).

Čitavo vrijeme rata za Bosnu i Hercegovinu (1992. – 1995.) proveo je sa porodicom u Gračanici, a najviše vremena bio je angažovan u redovima Armije BiH.

Nakon rata vraća se na svoj posao u Radio Gračanicu, gdje je posebno zapažen kao sportski novinar. Bio je redovan dopisnik *Oslobođenja* (Sarajevo), *Sportskih novosti* (Zagreb) i *Tuzlanskog lista*. Pored novinarstva, bavio se i pisanjem kratkih priča sa ratnom tematikom koje su objavljivane u Časopisu za kulturnu historiju *Gračanički glasnik* i Časopisu *Preporod* (Sarajevo). U *Gračaničkom glasniku* objavio je zapažen prilog o razvoju Biblioteke "Dr. Mustafa Kamarić". U slobodnom vremenu prikupljao je i etnološku građu o porijeklu familije Konjići, kao jedne od većih i poznatijih u njegovom rodnom selu Brijesnici. Uređivao je blog pod nazivom *Sport in*, a bio je aktivan i kao sportski radnik.

Pripremio je za štampu zbirku od 17 kratkih ratnih priča, ali nažalost, nije dočekaao njeno štampanje.

Ukopan je 23. 07. 2011. na mezarju Šabuša u Gračanici.

22. 07. 2011.

U ORGANIZACIJI "PREPORODA" – LIKOVNA KOLONIJA U GRAČANICI

Slikarica Refka Čajić, predsjednica gračaničkog "Preporoda", sa svojim saradnicima, uspjela je okupiti, uz domaćine, još desetak slikara iz Zenice, Tuzle, Lukavca, Kalesije, koji će slikati u Gračanici, inspirisani interesantnim detaljima, a posebno starinama ovoga gada. Ovo je duga po redu likovna kolonija u Gračanici, koja se organizuje u okviru kulturne manifestacije "Ljetne večeri pod lipama Gračanice". Umjetnici koji učestvuju u radu ovogodišnje kolonije, ostavit će i ove godine vrijedna ostvarenja građu domaćinu. Za očekivati je da će sljedeća kolonija biti još masovnija i još bolje organizovana.

29. 08. 2011.

31. SJEDNICA OPĆINSKOG VIJEĆA:

SMJENA NA ČELU OPĆINSKOG VIJEĆA – EDIN IBRIŠEVIĆ NOVI PREDSJEDAVAJUĆI

Premda nije bila na dnevnom redu, većinom od 18 glasova (uzdržano 11, protiv 1) "pod jedan" stavljena je tačka ove formulacije: "Smjena aktuelnog predsjedavajućeg Općinskog vijeća i izbor novog predsjedavajućeg Općinskog vijeća." Inicijativa za smjenu došla je iz Kluba vijećnika BPS. Nakon žučne rasprave, većinom od 19 glasova "za" i 11 "suzdržanih" odlučeno je da se Muharem Musić (LDS) dosadašnji predsjedavajući Općinskog vijeća smijeni, jer kao je rečeno u obrazloženju nije dobro obavljao funkciju, nakon čega je sa istim brojem glasova na njegovo mjesto izabran Edin Ibrišević (SDU). Ova smjena uslijedila je kao posljedica političkog pregrupisanja unutar većinske koalicije u Općinskom vijeću i nema veze sa ocjenom rada dosadašnjeg predsjedavajućeg Općinskog vijeća, kojom se niko ozbiljno nije ni bavio. To su potvrdile i zvanične ocjene i komplimenti kako od strane općinskog načelnika tako i iz redova vijećnika u vezi sa radom Muharema Musića na funkciji predsjedavajućeg, koje su uslijedile odmah čim je "isti postao bivši predsjedavajući".

Izgleda da su ostale tačke dnevnog reda

ove sjednice ipak bile u sjeni, prethodno spomenute i naknadno ubačene "tačke pod jedan". Bez veće diskusije usvojen je izvještaj o izvršenju Budžeta Općine Gračanica za prvo polugodište 2011. (ukupno ostvareni prihodi 4.909.526 KM, ukupno izvršeni rashodi i izdaci 4.174.754 KM), zatim izvještaj o utrošku sredstava tekuće rezerve Budžeta za prvo polugodište ove godine, te Odluka o uspostavi Registra budžetskih korisnika Općine Gračanica. Veću pažnju vijećnika nisu pobudile ni dvije odluke koje se odnose na regulisanje pitanja statusa javnih dobara koje koristi JP "Vodovod i kanalizacija", koja se povlače nakon izvršene privatizacije u ovom preduzeću. S tim u vezi Vijeće je usvojilo Odluku o proglašenju dobrom u javnoj upotrebi, u kojoj su identifikovana spomenuta dobra (počevši od izvorišta, do vodovodnih trasa i instalacija itd), a s tim u vezi i Odluku o davanju saglasnosti na korigovani početni bilans JP "Vodovod i kanalizacija". Do kraja sjednice usvojena je jedna odluka o promjeni statusa nepokretnosti u opštoj upotrebi na području KO Orahovica i Informacija o zimskoj službi na području općine, koja je pobudila nešto veću pažnju vijećnika, naročito zbog velikih razlika u plaćanju tih usluga po kilometru između pojedinih mjesnih zajednica.

23 i 24. 9. 2011.

ODRŽANA KULTURNO-VJERSKA MANIFESTACIJA "DANI MUHAMEDA TAJIBA OKIĆA" U GRAČANICI

Na ime i djelo Muhameda Tajiba Okića, rođenog Gračanlije, intelektualca svjetskog glasa, posebno u području islamske duhovnosti, koji je najbolje svoje stvaralačke godine proveo u Turskoj, još prije desetak godina pažnju lokalne i šire javnosti skrenuo je ovaj časopis u svome 14. broju (2002.), objavivši prilog svog saradnika iz Tuzle mr. sc. Kemala Bašića pod naslovom "Prof. Muhamed Tajib Okić – život i djelo". Od tada se iz Redakcije ovog časopisa pokušavalo nešto više uraditi na prezentaciji i proučavanju intelektualne zaostavštine tog velikog čovjeka, rasute

po svijetu, najviše u Turskoj. Za takav poduhvat mogućnosti ovog časopisa bile su isuviše skromne, pa su članovi Redakcije u više navrata pokušavali pokrenuti određene institucije da se time više pozabave. Ta su nastojanja rezultirala davanjem imena Muhameda Tajiba Okića jednoj od većih, novijih ulica u Gračanici (u naselju Hajdarevac), 1910. godine i, konačno, Kulturno-vjerskom manifestacijom "Dani Muhameda Tajiba Okića, na čijoj su organizaciji snage udružili: Općina Gračanica, Muftiluk Tuzlanski i Medžlis Islamske zajednice Gračanica.

Prvo je, po Programu Manifestacije, u okviru hudbe, na Džuma-namazu u novoizgrađenoj (još potpuno nedovršenoj) džamiji na Hajdarevcu (2. 9. 2011.), koju je predvodio Muftija tuzlanski Husein ef. Kavazović, bilo riječi o Muhamedu Tajibu Okiću i njegovom doprinosu islamskoj nauci i duhovnosti, zatim je izvršena promocija imena Ulice Muhameda Tajiba Okića (u blizini džamije). Simbolično otkrivanje table sa natpisom "Ulica Muhameda Tajiba Okića" obavili su načelnik općine Gračanica Nusret Helić i gradonačelnik turskog grada Mustafakemalpaša (Bursa) Sadi Kurtulan, kao gost Općine. U svojim prigodnim pozdravnim obraćanima, oni su se kratko osvrnuli na značaj imena i djela Muhameda Tajiba Okića, koji je trajno povezao Tursku sa BiH. Za mnogobrojne goste, kao i za ostale građane i omladinu, u večernjim satima, u prepunoj sali BKC, amateri kulturno-umjetničkih društava iz Lukavice i Gračanice izveli su vrlo uspio kulturno-umjetnički program. U foajeu BKC priređena je izložba fotografija iz života Muhameda Tajiba Okića, te izložba ručnih radova "Gračaničko keranje". Sutradan, 24. 09. 2011. održan je Naučni skup s međunarodnim učešćem "O životu i djelu Muhameda Tajiba Okića"

Prema općoj ocjeni, svi postavljeni ciljevi organizatora su u potpunosti postignuti: utemeljena je jedna izuzetno korisna i zanimljiva kulturno-vjerska manifestacija, uključujući i naučni skup, koji će biti inspirisan ili



■ NAUČNI SKUP „O ŽIVOTU I DJELU TAJIBA EF. OKIĆA“ – U PRVOM REDU, SLIJEVA NA DESNO: HUSEIN EF. KAVAZOVIĆ, MUFTIJA TUZLANSKI, SADI KURTULAN, NAČELNIK OPĆINE MUSTAFAKEMALPAŠA (BURSA, TURSKA), NUSRET HELIĆ, NAČELNIK OPĆINE GRAČANICA, DR. OMER NAKIČEVIĆ, PROF. NA FAKULTETU ISLAMSКИH НАUKA SARAJEVO, PROF. DR. ISMET BUŠATLIĆ, DEKAN FAKULTETA ISLAMSКИH НАUKA SARAJEVO, I MR. SC. KEMAL BAŠIĆ IZ TUZLE

će se nadahnjivati djelom Muhameda Tajiba Okića, a uspostavljena je i saradnja Općine Gračanica sa turskom gradom Mustafakemalpaša (Bursa) i nekim fakultetima u Turskoj, što će se, svakako, dalje proširivati i produbljivati.

24. 09. 2011.

NAUČNI SKUP S MEĐUNARODNIM UČEŠĆEM “O ŽIVOTU I DJELU MUHAMEDA TAJIBA OKIĆA” U GRAČANICI

...organizovan u okviru Kulturno-vjerske manifestacije “Dani Muhameda Tajiba Okića” okupio je sedam uglednih naučnika, među kojima i dvojicu iz Turske. Prije početka radnog dijela skupa, u prepunoj dershani Osman-kapetanove medrese, učesnike skupa je u ime domaćina pozdravio načelnik općine Gračanica, gosp. Nusret Helić, a potom se prigodnim pozdravnim riječima skupu obratio kao gost manifestacije, gradonačelnik turskog grada Mustafakemalpaša (Bursa), gosp. Sadi Kurtulan. Naučni skup je, uz prigodno obaćanje, otvorio Muftija tuzlanski Husein ef. Kavazović.

U radnom dijelu Skupa svoje radove prezentirali su: Dr. sc. Omer Hamzić, Općina Gračanica, *Društveni i duhovni život u Gračanici u vrijeme službovanja muderiza Mehmed ef. Okića u Osman-kapetanovoj medresi*; Prof. dr. Ismet Bušatlić, FIN Sarajevo, *Porijeklo porodice Okić*; Prof. dr. Avni İlhan, profesor emeritus İlahiyat fakultet Univerzitet Dokuz Eylül iz Izmir, *O doprinosu Muhameda T. Okića modernoj Turskoj*; Prof. dr. Mehmet Mahfuz Soylemez, profesor İlahiyat fakulteta Univerzitet Marmara u Istanbulu, *Doprinos M. Tajiba Okica razvoju povijesnih nauka*; Prof. dr. Omer Nakičević, FIN Sarajevo, *Osvrt na neke prepiske Muhameda T. Okića*; Mr. sc. Kemal Bašić, Tuzla, *Historija BiH u radovima Muhameda T. Okića, objavljenim u Republici Turskoj* i Mr.sc. Suad ef. Mujakić, Stolac, *Doprinos Muhameda T. Okića razvoju hadiske znanosti*.

Uz ocjenu da je ovaj naučni skup u potpunosti uspio, učesnici su zaključili da se organizuje i sljedeće godine (uz još bolju organizaciju i više učesnika) i da se prezentirani radovi

objave u posebnom zborniku ili ako to ne bude moguće u posebnom dodatku Časopisa za kulturnu historiju “Gračanički glasnik”. Učesnici skupa su se obavezali da autorizovane radove za objavljivanje dostave Redakciji “Gračaničkog glasnika” najkasnije do 1. 3. 2012. godine.

24. 09. 2011.

KULTURNO-VJERSKA MANIFESTACIJA “DANI MUHAMEDA TAJIBA OKIĆA”: POKRENUTA SLUŽBENA INICIJATIVA ZA BRATIMLJENJE OPĆINE GRAČANICA SA TURSKOM OPĆINOM MUSTAFAKEMALPAŠA (BURSA)

U pripremnoj fazi manifestacije uspostavljeni su prvi kontakti Općine Gračanica sa općinom Mustafakemalpaša (Bursa) u Turskoj u kojima je izražen obostrani interes za uspostavljenje čvršće saradnje, a potom i bratimljenja dva grada, odnosno dvije općine. Na poziv iz općine Gračanice, Manifestaciji je, kao gost, prisustvovao i gradonačelnik spomenute općine iz Turske, gosp. Sadi Kurtulan, koji je, tokom svog boravka u Gračanici, sa oduševljenjem prihvatio inicijativu o bratimljenju. Obavljeni su i službeni razgovori, poslije kojih su gospoda Helić i Kurtulan stavili svoje potpise na dokument pod naslovom “Zajednička izjava o namjeri uspostavljanja trajne prijateljske saradnje između Općine Mustafakemalpaša (Republika Turska) i Općine Gračanica (Bosna i Hercegovine)”. U dokumentu se konstatuje da postoje obostrani interesi za uspostavu trajne prijateljske saradnje između dvije općine i dva grada, prije svega na privrednom i kulturnom planu. U tom smislu, kako se kaže, načelnici su saglasni da se odmah pokrene procedura u nadležnim organima kako bi se što prije stvorili i formalni uslovi za potpisivanje dokumenata o bratimljenju dvije općine i dva grada. U međuvremenu, s obje strane činit će se naponi na povezivanju privrednika i uspostavi ekonomske saradnje, te prezentaciji kulturnih programa, sportskih ekipa itd. U skladu s tim, obje strane će zajednički podržavati, ove godine uteme-

ljenu Kulturno-vjersku manifestaciju “Dani Muhameda Tajiba Okića”, kojom se prezentira ime i djelo Muhameda Tajiba Okića, kao jednog od najvećih tursko-bošnjačkih učenjaka (rođen u Gračanici), čije djelo na najbolji način simbolizira trajnu duhovnu vezu između Turske i Bosne i Hercegovine. Trajna međusobna saradnja između općina Gračanica i Mustafakemalpaša uredit će se Sporazumom o bratimljenju kao i Zakletvom o bratimljenju, koja će se potpisati kad se za to stvore svi uslovi. Načelnici dvije općine su se obavezali da sa ovom izjavom upoznaju nadležne predstavničke organe i građane dvije općine, kao i širu javnost.

29. 09. 2011.

32. SJEDNICA OPĆINSKOG VIJEĆA: USVOJENA ODLUKA O SPOMEN OBILJEŽJIMA NA PODRUČJU OPĆINE

Ovom Odlukom unosi se više reda u postupku trajnog obilježavanja značajnih događaja i ličnosti, te aktivnostima na njegovanju kulturno-historijske tradicije i očuvanju kulturne baštine na području općine. Odlukom je jasno precizirano šta se smatra spomen-obilježjem, kako se utvrđuju značajni događaji i istaknute ličnosti itd. Razrađena je i procedura podizanja spomen-obilježja (od pokretanja inicijative, do pribavljanja odgovarajuće dokumentacije i konačne dozvole za podizanje spomenika) i, što je jako važno, zaštita i održavanje spomenika. Do sada je to pitanje bilo potpuno neuređeno, tako da je prisutno dosta stihije u podizanju spomen-obilježja (posebno događajima i ličnostima iz posljednjeg rata), a već su izraženi i problemi oko održavanja tih spomenika, od kojih je jedan broj gotovo zaboravljen i zapušten.

Treba još napomenuti da se ova odluka ne odnosi na spomen-obilježja, koja u skladu sa zakonom imaju status spomenika kulture. Njihovo očuvanje i održavanje regulisano je posebnim propisima.

Pored ove, Vijeće je usvojilo još dvije odluke koje se odnose na međunarodnu saradnju. Konkretnije, riječ je o odlukama o

ustanovi saradnje općine Gračanica sa općinom Latina u Italiji i općinom Mustafake-malpaša (Bursa) u Turskoj.

Bez veće rasprave i konkretnijih zaključaka vijećnici su usvojili informaciju o stanju okolice – ekološkoj situaciji na području općine i upoznali se sa Zakonom o izmjenama i dopunama Zakona o mirovinskom i invalidskom osiguranju (u prednacrtu), koji je na javnoj raspravi i zakonom o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom (u nacrtu), koji je takođe u javnoj raspravi. Vijećnici nisu imali primjedbi ili prijedloga za poboljšanje teksta tih zakona.

8. 10. 2011.

ZEMLJORADNIČKA ZADRUGA “GRAČANKA”: DRUGA IZLOŽBA STOČARSTVA “GRAČANICA – DOBOJ ISTOK 2011.”

Ovu manifestaciju po drugi puta, na lokaciji “Ratara” (buduća nova stočna pijaca na Stankovim barama) uspješno organizuje Zemljoradnička zadruga “Gračanka” u partnerstvu sa općinama Gračanica i Doboj Istok i uz pomoć udruženja poljoprivrednika dvije općine, resornih ministarstava F BiH i TK, te Poljoprivrednog zavoda TK. Mada tek u začetku, izložba je privukla pažnju proizvođača i drugih subjekata koji su zainteresovani za unapređenje poljoprivrede, kao jednog, još uvijek nedovoljno iskorištenog privrednog resursa. Na izložbi su učestvovala 32 proizvođača mlijeka, mesa i drugih poljoprivrednih proizvoda, od kojih su najuspješniji dobili priznanja i nagrade organizatora. Na otvaranju izložbe govorili su Općinski načelnik Nusret Helić i direktor “Gračanke”, Rasim Husić kao inicijator i glavni organizator Izložbe. Bez obzira na skromne dimenzije ove smotre (koju, svakako, treba dalje konceptijski i organizaciono dograđivati), njeni početni rezultati pokazuju u kojem

pravcu treba tražiti izlaz iz naših teškoća – posebno kada je u pitanju zapošljavanje i korištenje raspoloživih resursa – to je glavna poruka sa ove manifestacije.

31. 10. 2011.

33. SJEDNICA OPĆINSKOG VIJEĆA GRAČANICA: REBALANS...

Općinskog budžeta za 2011. usvojen je jednoglasno i zasniva se na realnom ostvarenju prihoda i primitaka, kao i izvršenju izdataka za prvih 9 mjeseci, te procjeni ostvarenja budžeta do kraja ove godine. Rebalansom je predviđen budžet u iznosu od 11.583.000 KM, što je u odnosu na ranije usvojeni budžet manje za 193.000. Ukupni prihodi planirani su u iznosu od 9.992.000 KM, što je u odnosu na raniji budžet više za 88.000 KM. Porezni prihodi su ostali približno na istom nivou. Neporezni prihodi su povećani za 151.000 KM, a tekuće potpore su smanjene za 64.000 KM. Najveće korekcije se odnose na stavku “plaće” i naknade troškova zaposlenika (smanjenje za 175.000 KM), dok se ostala smanjenja odnose na projekte i izdatke koji realno neće biti realizovani do kraja godine, bilo zbog toga što nisu pripremljeni ili što nema dovoljno finansijskih sredstava. Takvi projekti su, npr. “Stara džamija” u Sokolu kao kulturno – historijski spomenik, neki vodovodi po mjesnim zajednicama, rasvjeta itd. Povećanja, uglavnom, odnose na realne potrebe, procjene do kraja godine (troškovi električne energije, centralno grijanje, zimske službe itd.).

Osim rebalansa, Vijećnici su, uglavnom bez diskusije, usvojili još i Odluku o imenovanju Komisije za utvrđivanje prometne vrijednosti, nepokretnosti i prava, (članovi komisije ostaju u istom sastavu) i Informaciju o zaštiti imovine od požara na području Općine Gračanica u periodu od 01. 01. – 30. 09. 2011. godine.